

# KLAUS IRMSCHER

S Ä N G E R | S O N G S C H R E I B E R

## BINSEN IN'N WIND

Klaus Irmischer 06/2019

De Binsen, de wippt, de Wind beegt se scheef  
Dör't Woter kannst dörkieken - vörn ward all deep  
De Welln sprütt mit blankpoleert Fier vonne Sünn  
Miene Fööt staakt in't Woter rin  
Mit'n Rad över'n Steg över'n Sump bi de Quell  
So keem ik na miene Badestell  
De See speegelt grön in'n Wald mittenin  
Bet an'n Buuknabel stah ik all binn'

(Refrain:)

Ik pett in't Pedal een halve Stünn  
Un de Binsen, de wippt, un de Wellen, de stippt inne Sünn

Ik tapp mit de Fööt op weeken Sand  
Ik kiek bet an'n Grund, sprütt mi natt mit de Hand  
Düük in bet an'n Hals - swümm los mit'n Zisch  
Un ik swümm umme Wett mit de Fisch

Dat Woter strakelt mien heele Huut  
Mien Badebüx roht sik in'n Rucksack ut  
Dör Glitzerwell'n swümm ik wech vun dat Land  
Rut na de gröne Wand

Trüch inne Bucht, wo de Binsen sik beegt  
Wo dat Schilf sachten flattert, in'n Wind sik weegt  
In sünndorchlücht Woter land ik op Sand  
Een Ellernast treckt mi an Land  
Över Boomwoddeln kladder ik na miene Plünn'  
Dröög mi af un kiek na de Welln inne Sünn  
Un de Binsen, de wippt vör mien Fenster ut Twieg  
As se danzt na de Vagel-Musik

As Schooljung weer ik hier all togang  
Dumm Tüch mit miene Frünnen - stünnenlang  
Un sünndags hier rut mit'n Rad mit Muddern  
Fedderballspeeln un Picknick-Futtern  
Dor sää se: „Kiek mol - de Welln as se blink!“  
Un achterran na dörtig Johr  
Mien Fru un mien Dochter weern ook mit dor  
De Fedderball suust - un ganz ut de Pust  
Sää ik: „Kiek mol, de Binsen in'n Wind, as se wink!“

Ik pett in't Pedal een halve Stünn  
Denn düük ik hier in un de Welln, de speelt mit de Sünn